

Date – 02/08/2025

Time - 7:30 -7:40Hrs
AKASHVANI AIZAWL

REGIONAL NEWS BULLETIN

HEADLINES (MORNING)

- 1. Ni hnih kalta chhung khan Mizorama Covid-19 hri kai leh kai lo endik mi 7 zinga 5 chuan hri an kai tih hmuhchhuah a ni.**
- 2. Mizorama raltlan awmte kutzia leh mit-naute lakkhawm hna chu Serchhip, Lunglei, Champhai leh Hnahthial district-ah te tan a ni.**
- 3. External Affairs Ministry chuan ralthuam neih kawngah ramina mamawh dan leh uluk taka zirchian anih hnuah lei thin a ni a ti.**
- 4. Ramchhunga rel stationah te June ni 30 thleng khan damdawi mantlawm zawrhna Jan Aushadi Kendra 106 dah a ni tawh.**

<><><>

COVID SITUATION

Ni hnih kalta chhung khan Covid-19 hri kai leh kai lo endik mi 7 zinga 5 chuan hri an kai tih hmuhchhuah a ni.

Integrated disease surveillance programme (IDSP) hotute hnen atanga thu dawn danin Thawhleini a Covid hri kai hmuhchhuah pakhat enkawl mek tiamin tun dinhmunah Covid hri kai 6 enkawl mek an awm a. Hri kai an ni tih lang chhuak an awm lova, dam lo na an awm lo. An vai hian Aizawl district ami vek an ni. Kumin hian May thla laihawlah khan Covid hri kai hi hmuhchhuah leh hmasak ber a ni a hmuhchhuah thar ber tiam hian kuminah Mizoramah Covid-19 hri kai mi 19 hmuhchhuah a ni tawh a. Endik loh avanga hmuhchhuah loh tam tak an awm rin a ni.

Kum 2020 bul lama Mizorama Covid lo luh ve rinhlelhna a awm atanga tun thleng hian sample nuai 19, sing 9, sang 7 leh 863 endik a ni tawh a. An zinga nuai 2, sing 3, sang 9 leh 654 te chuan Covid an kai tih hmuhchhuah a ni. Covid hri kai zingah a vaiin mi 734 an thi a. Kum 2021 khan thi tam berin mi 538 thi chhinchhiah a ni a, kum 2022 khan mi 180 thi a chhinchhiah a ni a, kum 2020 leh 2023 khan mi 8 ve ve an thi bawk a ni.

<><><>

ASSEMBLY BAC

Tun thla ni 27 atanga tan tur Mizoram legislative assembly fur thutkhawm hun hman dan tur duangtu Business Advisory Committee (BAC) chu kar leh Nilaini, August ni 6 khian an thukhawm ang.

Assembly Secretariat atanga Akashvani Aizawl-in thu a dawn danin sorkar atangin dan siam thar tur emaw dan dinglai siamthat tur rawtna emaw engzat nge lo lut dawn a la hriat theih rih loh a. BAC thutkhawm hunah chuan a tlangpui hriat theih tawh tura ngaih a ni. Environment, Forests & Climate Change atangin official resolution putluh tur pakhat a luh tawh thu dawn a ni. Puan tawh angin larsap Gen. Vijay Kumar Singh chuan state legislative assembly fur thutkhawm hi August ni 27 atanga tan turin a ko a. Assembly speaker Pu Lalbiakzama kaihhruai, legislature party hrang hrang aiawhte telna BAC hian assembly inkhawm rei zawng tur leh hun hman dan tlangpui a duang dawn a ni.

Tuna assembly fur thutkhawm lo awm tur hi assembly 9-na vawi 5 thutkhawmna tur a ni.

<><><>

ASPIRATIONAL DIST

Sorkar laipui scheme 'Sampoornata Abhiyan' kalpui meka Lungsen Aspirational Block hmasawwna tura thawktute chawimawina hun, 'Samman Samaroh' leh kar khat awh tur tualchhung thil siam chhuah pho chhuahna, 'Aakanksha Haat' Saikuti Hall Ground Floor-ah nimin khan buatsaih a ni a, Lunglei District Bawrhsap Pi Navneet Mann chu khuallian a ni.

Lunglei Sub-Deputy Commissioner Pi Lalnunchhani Hnamte chuan hun a kaihruai a. Aspirational Block Programme (ABP) hnuaia hmasawwna tehfung paruk zingah Lungsen Block chuan tehfung pali-ah zaa za tihlawhtlingin, bronze medal a dawng a. He hlawhtlinna kawnga thawktu hrang hrangte hnenah chawimawina hlan a ni a. ABP indicator 6 zingah - hriselna leh chaw tha (health & nutrition) hnuaiah zunthlum endik, thisensang endik leh raipuarte tana chaw tha pek that kawngah leh agriculture hnuaiah lei hriselna endik leh soil health card pek chhuah kawngah te Lungsen Block hian target zaa zaa hlen chhuak a. Indicator dang pahnih - raipuar an nau pai tirh thla thum chhunga inziah luh kawngah leh SHG-te tana bul tanna sum lu pek chhuah kawngah pawh hmasawwna nasa tak hmuh a ni.

Aakanksha Haat-ah hian Lungsen RD Block hnuaia SHG-te thil siam - kut themthiam thil leh ei tur chi hrang hrang pho chhuah a nih bakah, Lunglei RD Block atangin tahpuan; District Agriculture Office atangin thlai chi, thlai enkawlina damdawi, kut hna thawktute thar chhuah hrang hrang leh PM-KISAN service; KVI Board Lunglei atangin handicraft item; leh District Horticulture Office atangin pangpar leh a kaihhnawih, ei leh in tur chi hrang hrang te pho chhuah a ni a.

Deputy Commissioner office, health department leh bank lam te'n Aadhaar siam that, tribal, residential leh income certificate dilna, bank account hawn, NCD natna endik te an kalpui a. Kar leh Thawhtanniah Commerce & Industries lamin sumdawwna kalpui dan inzirtirna leh Nilaini-ah RSETI lamin thiam thil inzirtirna (skill development programme) an buatsaih ang.

<><><>

BIOMETRIC ENROLMENT

Mizorama raltlan awmte kutzia leh mit-naute lakkhawm hna chu Serchhip, Lunglei, Champhai leh Hnahthial district-ah te tan a ni.

Serchhip district-ah hian Nilaini atang khan Myanmar leh Bangladesh atanga raltlante biometric enrolment hi tan a ni a, SDO (Sadar) Pi Rebecca Laldinmawii Hrahsel sawi danin July ni 30 hian Serchhip Chanmary VC huam chhunga Myanmar raltlan awmte kutzia leh mitnaute thla lakkhawm hna hi tan a ni a, karleh Thawhtanni leh Zirtawpni-ah chhunzawm leh a ni ang. Serchhip district-ah hian veng leh khaw 30-ah raltlan an awm a. Myanmar raltlan hi mipa puitling 198, hmeichhia 150 leh naupang 299, an vaiin 647 an awm a. Thenzawl khawpui bikah Bangladesh raltlan mipa puitling 75, hmeichhia 73 leh naupang 118 awmin an vaiin 266 an awm a ni. Serchhip district a raltlan awmte hi relief camp-ah awm lovin an chhungkhat laina leh thiante bel deuh vek an ni a, mi in luaha awm an awm bawk.

July ni 30 vek khan Lunglei district-ah pawh Myanmar raltlan 70 chuang awmna Ramthar camp atangin an tan a, thenkhat Aizawl lama sikul kalte erawh chu hun remchanga bawhzui leh tura dah a ni a. Kar leh lamah chhunzawm chhoh zel tum a ni. Lunglei district-ah hian Myanmar raltlan hi 1,991 an awm ni a chhut a ni.

Myanmar raltlan awm tam berna Champhai district-ah chuan Ningani khan Champhai khaw chhunga VC 3-ah biometric enrolment hi tan a ni na a, khawl a chian loh avangin a takin an kalpui thei meuh lova ni. Champhai district-ah hian raltlan hi mi 13,586 an awm mek ni a chhinchhiah a ni.

Hnahthial district-ah pawh Hnahthial District Level Committee on Displaced Persons hmalakna in nimin piah atang khan Hnahthial District chhung, Thingsai khuaah Biometric Enrollment of Displaced Persons kalpui tan a ni a, a tah tawlin khaw dangah pawh kalpui chhunzawm zel tura ruahmanna siam a ni a. Bawrhsap pisa chhinchhiah danin tun dinhmunah hian Hnahthial district chhung khaw sawm hnih-ah Relief Camp 13 leh mi in luah Myanmar raltlan mihring 701 an awm mek a. Thingsai-ah hian tam berin mi 230 an awm a, raltlan zingah hian puitling 436 (mipa 198 leh hmeichhia 238) bakah naupang kum tling lo 265 an awm mek a ni.

Tun dinhmunah hian Mizoramah Myanmar raltlan hi mi 32,504 an awm mek ni a chhinchhiah a ni a ni.

<><><>

CHAMPHAI

Nimin khan Champhai District a Lianpui khuaa Branch YMA member te chuan chhiat an tawh avanga thlawhhma kawng zawh mumal thei lo, Pu Zamdinglianate chhungkaw thlawhhma, buh hmun tin khat vel chinna leh Sawhthing quintal 3 vel chinna chu an thlawh zawh sak a, Chawhnu lamah thlawhhma dang pawh an thlawh zawh sak bawk.

Pu Zamdingliana hi July ni 22 khan a nupui Lalnunnemi chuan a thih sana, a fa naupang te te, kum 9 mi leh kum 3 mite chu ramah riahpuin a

thlawhhma hi a enkawl tha thei meuh lova, Lianpui branch YMA Member 56 hnatlanga thawk chhuak ten Tiau lui kam, Chithar rama a thlawhma, Lianpui khua atanga KM 9 vela hla a mi chu nimin khan an thlawh zawh sak ta a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

LUNGLEI POST OFFICE

Lunglei Dak In pui, Post Office chu Sorkar laipuiin tunlai thiamna IT 2.0 kalpui tur a tih angin inbuatsaih nan khar rih a ni a, karleh ni 5 ah hawn a ni ang.

Thil inthawn nan te leh pawisa chevel tih nan Soft ware thar hman dan te leh thil tul te tihfel a ngaih vingin inbuatsaih nan hun an mamawh tih Pu Thanghmingliana Post Master chuan a sawi. Speed Post te pawh Gpay hmang a tih theih turin QR Code an dah dawn a, bungraw lian chah tu te pawhin dak In a an bungrua lak ngai kher tawh lovin an Inah an dahsak ve thei dawn a, mahse hei hian Zotlang leh Luangmual inkar a huam rih ang a ti. Dak In a thil thawn te hi Bar Code pek a nih hlawm tawh dawn avangin thil thawn te pawh a chhui theih vek tawh dawn a, thil thawn bo tih ang chi chu awm tawh lo tur a ngaih a ni a ti.

Kan corr sawi danin, Dak Inah hian pawisa dah dan phung leh a system a awlsam bawk si avangin a hre thang chuan an bawr hle a, Saving a/c hi Post Office-ah hian hawngin Moble phone-ah Postinfo download in pawisa dah dan, a pun dan, lak chhuah theih hun tih te leh kan thil thawn kal kual vel dan tih leh thil dang mahni pawhin a enfiah zung zung theih tawh a, mipui tan service tha tak pek chu an tum a ni tih an sawi.

Tuntum a IT 2.0 hi India ram pum a hman tur a tih a niin Mizoram hi a hmang hmasaber (model) tur a ni a, State dangah chhunzawm tur a tih a ni. Post Office Lungleiah hian PostMaster hovin thawktu 24 an awm mek.

<><><>

EXTERNAL AFFAIRS

External Affairs Ministry chuan ralthuam neih kawngah ram in a mamawh dan leh uluk taka zirchian anih hnuah lei thin a ni a ti. MEA thupuangtu Randhir Jaiswal chuan New Delhi-a chanchinbumiten ralthuam an lei dan zawhna chhangin he thu hi a sawi a. Energy neih kawngah pawh lei tur awm dan a zir leh khawvel dinhmun thlir chungin an sei thin a ti a. India leh Russia inlaichinna chungchang zawhna chhangin ram hrang hrang nena

inlaichinna chuan thatna hran an neih theuh thu a sawi a. Rusia leh India inlaichinna pawh a ngheh thu sawiin hun khirh tak tak paltlang tawh a ni a ti bawk.

<><><>

JAK

Union Minister of State for Chemicals and Fertilizers Anupriya Patel chuan ramchhunga rel stationah te June ni 30 thleng khan damdawi mantlawm zawrhna Jan Aushadi Kendra 106 dah a ni tawh tih a sawi a. Lok Sabha-a ziaka zawhna chhangin Pi Patel-i chuan rela khualzin ten damdawi man tlawm leh tha an hmuh theih nan sawrkar chuan hetiang hian hma a lak thu a sawi a. Rampumah Jan Aushadi Kendra hi Pradhan Mantri Bhartiya Janaushadi Pariyojana hnuaiah sing 1 sang 6 leh 912 siam tawh a ni a ti a. Heng zingah hian 8660 chu thingtlangah dah a nih thu a sawi a ni.

<><><>

NATIONAL FILM AWARDS

National Film Awards vawi 71-na nimina semah 12th Fail chuan Best Film Award a dawng. National Film Awards Best Actor atan Jawan-a changtu Shah Rukh Khan leh 12th Fail changtu Vikrant Massey te thlan an ni a. Rani Mukerji chu Mrs Chatterjee Vs Norway avangin Best Actress ah thlan a ni bawk.

<><><>